

Uunga siunnersuut: Inatsisartut Naatsorsueqqissaartarfik pillugu inatsisaanni inatsimmik allannguineq nr. xx xx. xxx 2017-imeersoq
(Aningaasaqarnermut Akileraartarmullu Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit maanna Inatsisartut Naatsorsueqqissaartarfik pillugu inatsisaanni inatsimmik allannguissamut siunnersuut saqqummiuppara.

Inatsisissatut siunnersuut aallaavigalugu Naalakkersuisut pisinnaatitaallissapput siulersuisunut ilaasortanut akissarsiarititassatut annertussusissap inissineqarsinnaanissaanut, aammattaaq siulersuisuni ilaasortat Naatsorsueqqissaartarfimmi siulersuisunut ilaasortaanerminnut atatillugu angalanerannut, nerisaqarnerannut, inissaqarniarnerannut assigisaanullu atatillugu ajunngitsorsiassarisaanut inissiisinnaatitaassallutik.

Naatsorsueqqissaartarfik ukiorpassuarni maani nunami aningaasaqarniarnerup, inuiaqatigiit naatsorsuusiortarullu iluini misissueqqissaartarsimapput missingersuusiortarsimallutillu. Naatsorsueqqissaartarfimmi naammassineqartartut pitsaassutaannut peqquataaqataasut tassaapput siulersuisuni ilaasortat. Siulersuisuni ilaasortat inuiatigiinninngaanneersuupput assigiinngitsuninngaanniit taamaakkaluartorli assigiissutigalugu tamarmiullutik Kalaallit Nunaannut tunngassutilinnik ilisimasaqarluarnertik.

Naalakkersuisullu kissaatigaat atorfirmut tassunga kajumissuseqarnerulertoqarnissaa qulakkeerneqassasoq, taamaattumillu Naatsorsueqqissaartarfimmi siulersuisuni ilaasortaanerup iluani inatsisitigut akissarsiaqarnerup iluani allannguisoqarnissaanut siunnersuusiortoqarsimalluni. Suliassamik taassuminnga suliaqarneq maannamut akissarsiassartaqanngilaq. Siornatiguulli pisortaqaqarfinni assigisaanilu atorfillit siulersuisuni ilaasortaanerartillugit akissarsiassaqaqartinneqarneq ajorput, inatsisissatullu siunnersuummi uani killilersuineq taanna peerniarneqarpoq, taamaasiornikkullu qulakkeerniarneqassalluni siulersuisuni ilaasortaanissap kajungernerulernissaa, suliarinnissinnaasullu amerlanerulernissaat.

Naggataatigullu inatsisissatut siunnersuummut oqaaseqaatigineqarsimasunullu innersuutissavassi.

Taama oqaaseqarlunga Naalakkersuisut sinnerlugit siunnersuut Inatsisartunut suliassanngortippara.